

**PM suarakan kepentingan negara ASEAN untuk peroleh vaksin COVID-19 -
Hishammuddin
Astro Awani
15 November 2020
Firdaus Azil**

KUALA LUMPUR: Malaysia telah mengambil langkah menyuarakan kepentingan untuk semua negara ASEAN berganding bahu dengan pertubuhan antarabangsa bagi memastikan vaksin COVID-19 mudah diperolehi di rantau ini, sebaik ia berjaya dibangunkan.

Menteri Luar, Datuk Seri Hishammuddin Tun Hussein berkata, perkara itu telah dibangkitkan oleh Perdana Menteri, Tan Sri Muhyiddin Yassin dalam Sidang Kemuncak ASEAN termasuk mesyuarat dengan rakan-rakan dialog ASEAN.

Selain itu, jelas beliau lagi, Malaysia juga menjadi satu-satunya negara yang berani menegaskan pendirian secara terbuka mengenai isu kebencian dan perpecahan yang semakin mengancam dunia.

“Malaysia lantang menyatakan bahawa semua pihak mesti mengelak sebarang tindakan keganasan apatah lagi atas nama agama sehingga boleh menimbulkan kesalahfahaman seperti Islamophobia.

“Malaysia juga mengulangi ketegasan berhubung aspek keselamatan, termasuk krisis di wilayah Rakhine yang mana Malaysia percaya negara-negara ASEAN perlu melakukan perbincangan mendalam demi mencari penyelesaian jangka panjang,” katanya lagi.

Hishammuddin berkata demikian dalam sidang media Penutup Sidang Kemuncak ASEAN Ke-37, di ibu negara hari ini.

Selain isu tersebut, Hishammuddin berkata, Malaysia sekali lagi menyuarakan ketegasan mengenai isu Laut China Selatan dan menuntut semua pihak berpegang pada pendirian bahawa sebarang isu di perairan ini mesti diselesaikan secara aman berpandukan undang-undang antarabangsa.

Walaupun Palestin bukan isu serantau, Hishammuddin berkata, Malaysia tetap memanfaatkan platform persidangan antarabangsa termasuk sidang kemuncak ASEAN bagi menunjukkan sokongan padu negara terhadap Palestin dan rakyatnya.

“Pendirian Malaysia teguh dan konsisten bahawa satu-satunya penyelesaian terhadap konflik Palestin-Israel adalah penubuhan negara Palesti yang bebas, berdasarkan sempadan pra-1967, dengan Baitulmaqdis sebagai ibu kota negara.

“Pendirian Malaysia ini tidak akan berganjak sampai bila-bila,” tegas beliau lagi.

Hishammuddin berkata, Malaysia berharap setiap perbincangan, kesepakatan dan persetujuan yang dicapai menerusi Sidang Kemuncak ini dapat diterjemahkan kepada persekitaran AEAN yang lebih baik dari sudut ekonomi, sosial dan keselamatan.

**© 2020 Astro Awani Network Sdn. Bhd.
(535275-D) All Rights Reserved.**

Source: <https://www.astroawani.com/berita-malaysia/pm-suarakan-kepentingan-negara-asean-untuk-peroleh-vaksin-covid19-hishammuddin-268531>